

## **Dithero tsa Tirelano mo Kutlwanong**

50/2014 Ka Sontaga 16 morago ga moletlo wa Modimo o o Borarobongwe, e le ka 05. 10. 2014

### **MO LEINENG LA MODIMO O E LENG RARA LE MORWA LE MOWA O O BOITSHEPO!**

Lefoko le le okamelang beke eno le kwadilwe mo go 2 Tim. 2:10b, le re: **"Keresete Jesu, Mogolodi wa rona ke yo o nyeleditse loso, a baya botshelo le bosasweng mo leseding ka Efangele."**

1. Sefela sa 202 - 187/195

**2. Thapelo:** Morena Modimo Rara yo o mo legodimong, re a go leboga, ka o re golotse mo boleong le mo boikepong jo bo isang tatlhegong; re a go leboga, ka o re bileditse mo tumelong e e isang mo phologong ya botshelo jo bo sa khutleng. Ke gona re go kopang gore o re tiise mo tumelong eo, re kgone go emalalana le dithaelo tsotlhe tse Satane a lekanang ka tsona go re busetsa mo taolong ya bolelele le mo boitaolong jwa boikepo; o re thuse gore re tswelale mo tumelong ka boikanyo, le ka boitshoko, le ka tsholofelo ya gore re tla amogela tse re di solofeditsweng ke wena ka Morwao yo o rategang Jesu Keresete, re nnele ruri mo tumelong, re dirafatse thato ya gago e re e senoletsweng mo molaong wa gago, le mo Efangeleng ya ga Jesu Keresete. Morena, dirisa thata ya gago ya go re pholosa, rona le bagaetsho botlhe, le ba merafe yotlhe, botlhe botlhe ba gogelwe mo go Keresete, ba bolokelwe mo go ene. Re kopa jalo ka ntlha ya botsalo le loso le tsogo ya ga Jesu Keresete. Amen.

3. Lefoko la Testamente e kgologolo le kwadilwe mo go Dilelo 3:22-32

Epistolo ka fa thulaganyong ya 2 e kwadilwe mo go 2 Timotheo 1:7-10;

Efangele ka fa thulaganyong ya 1 e kwadilwe mo go Johane 11:1-3.17-27.41-45.

4. A go ipolelwe tumelo ya bokeresete!

5. Sefela sa 188 - 174/181

6. Thapelo ya mmadi wa thero.

**7. Epistolo** ka fa thulaganyong ya 6 e kwadilwe mo go Bahebere 10:35-39, e re: "Ka moo he, se latlheng boikanyo jwa lona jo bo nang le tuelo e kgolo! Gonne boitshoko bo lo tshwanetse,

e tle e re lo sena go dirafatsa thato ya Modimo, lo amogele se se solofeditsweng. Gonne go a tse: 'Go sa ntse go le sebakanyana se sekhutshwanyane, mme yo o tshwanetseng go tla, o tla tla, a sa diege. Mme mosiami wa me o tla tshela ka tumelo; mme fa a ka ikepa, mowa wa me ga o ne o mo itumelela.' Mme rona ga re ba boikepo jo bo isang tatlhegong, re ba tumelo e e isang phologong ya botshelo." Amen.

**8. Thero:** Barategi mo Moreneng wa rona Jesu Keresete, rona ga re ba boikepo jo bo isang tatlhegong, re ba tumelo e e isang phologong ya botshelo. A boipolelo jo bontle ke jo! Mokwadi wa lokwalo lwa Bahebere o bua jalo, le fa a itse gore mo gare ga baamogedi ba lokwalo go ne go na le bangwe ba ba neng ba sa tlhole ba ikanyega mo go kalo mo tumelong. Mme mo bokoeng jwa tumelo ya bone o ne a sa rate go ba neela mo go Satane, gongwe mo thateng ya bolelo. A ba kwalela gore ba itse kotsi e motho a tsenang mo go yona, fa a ineela mo boitaolong le mo boikepong, ba itise, ba tshabe kotsi eo, ba se ka ba fapogela mo tseleng e e yang mo tatlhegong, le e seng go tswelela ka yona, mme ba gopodiwe ka letlhogonolo le legolo le motho a tshelang mo go lona, fa a le mo tumelong ya bokeresete, fa e le wa tumelo e e leng yona, a itse gore ke tumelo e e isang phologong ya botshelo jo bo sa khutleng.

Boammaaruri jo jwa gore boikepo ke se se bosula tota, bo isa tatlhegong, ga se sengwe fela se baruti ba boifisang batho ka sona, se ba ba tshosang ka sona, mme ke kotsi tota, ke se se isang tatlhegong. Gape ga se sengwe fela se se sa ameng kamano fa gare ga batho le Modimo. Ke se se galefisang Modimo. Boikepo ga bo itumedise Modimo Motlhodi wa rona. Modimo o ineetse tota go tthagisa batho gore ba se ka ba tswelela mo boikepong, le e seng mo boitaolong. Go tswa mo tshimologong Modimo o boleletse batho gore ba se ka ba ikepa, ba se itaole, ba se tlole ditaolo tsa ona, wa re: Yo o di tloang o tla tsena mo losong. Ditlolo tsa molao wa Modimo, bolelo, boitaolo, boikepo bo isa tatlhegong. Mme Modimo ga o kgathwe ke loso lwa moikepi. Ga o batle gore batho ba latlhege. O a batla gore ba tlabologe, ba tshela, ba tiie mo tumelong, ba isiwe mo phologong ya botshelo.

Ke gona re bolelelwang kajeno, fa rona ba re dumelang mo go Jesu Keresete, ba re kolobeditsweng mo leineng la gagwe, ba re amogelang mmele wa gagwe, le madi a gagwe, ba re itshwarelwang dibe mo leineng la gagwe, re a bolelelwa gore tumelo eo ke e e re isang mo phologong ya botshelo jo bo sa khutleng ka ntlha ya ga Jesu Keresete. Mme go bolelwa ka thanolo e kgolo gore ga se tumelo e e botlhofo fela, mme ke tumelo e motho a kaiwang mosiami ka yona, jaaka re utlwa ka mafoko a a reng: "Mme mosiami wa me o tla tshela ka tumelo." Ke gore yo e leng mosiami ka tumelo o tla tshela. Ke tumelo e moleofi yo o

ikwatlhaelang maleo a gagwe, a ba a dumela gore Jesu Keresete o ne a mo swela mo sefapaanong, a mmaakanyetsa tsogo le botshelo jo bo sa khutleng ka tsogo ya gagwe a kaiwang ka yona mosiami fa pele ga Modimo. Ke tumelo ya go ikanya gore Jesu ke Mmueleli wa rona mo go Rara yo o mo legodimong, ke ene yo e leng thuanano, gongwe tetlano ya maleo a rona, mme e seng ya maleo a rona fela, mme e bile ke ya maleo a lefatshe lotlhe. Ka tsela eo tumelo e isa mo tshiamong le mo phologong ya botshelo jo bo sa khutleng.

Ga se tumelo e e botlhofo fela, mme e bile ke boikanyo jo bo nang le tuelo e kgolo. Ga se go dumela fela, mme ke go ikanya ka pelo yotlhe gore tse re di solofeditsweng ke Modimo re setse di dirafaletswe, o kolobetsong ka temelo, gape re tla di dirafalelwa mo nakong e e tlang ka go di bona mo kgalalelong e e sa khutleng. Ga se tumelo ya go dumela fela, mme ke tumelo e e godisiwang ka mafoko a le mantsi a magolo mo Beibeleng yotlhe, le mo kgaolong e e latelang ditemana tsa Lefoko la thero ya kajeno. Foo go buisega jaana: "Jaanong tumelo ke go ikanya dilo tse di solofelwang le go tihomamisa dilo tse di sa bonweng. Gonne ba bogologolo ba bonye tshupo ka ntlha ya yona. Ke ka tumelo re tihaloganyang gore lefatshe le dirilwe ka Lefoko la Modimo; ke gore dilo tse di bonwang ga di a ka tsa dirwa ka dilo tse di bonalang." Ga se tumelo ya go dumela fela, mme ke go ikanya ka tihomamo tse re di bolelelwang mo tumelong ya bokeresete mo diartikeleng tse tharo, fa re di diretswe. Ga re ipolele fela ka molomo, fa Modimo e le Motlhodi, fa e le Mogolodi, fa e le Moitshepisi, mme e bile re ikanya ka pelo yotlhe gore Modimo ke Motlhodi yo o re tihodileng, ke Mogolodi yo o re golotseng, ke Moitshepisi yo o re itshepisang ka go re itshwarela maleo ka malatsi otlhe, ka go re goga mo boammaaruring, ka go re gogela mo boitshokong le mo tirafatsong ya thato ya Modimo.

Tumelo ga se se se botlhofo fela. Nyaa, ke se se kopantsweng le boitshoko jwa go itshokela mathata le matshwenyego a le mantsi mo lefatsheng leno. Ke sona se se gatelelwang ka mafoko a Lefoko la thero ya kajeno, a a reng: "Gonne boitshoko bo lo tshwanetse." Di dintsi jang tse di dirafalang mo botshelong jwa badumedi tse di ba raelang go ba faposa mo tseleng ya tumelo, mo tseleng e e isang mo phologong ya botshelo jo bo sa khutleng: Maleo, makgapha, tsholofologo, diphatsiphatsi tsa lefatshe, Satane ka esi. Ke gona Jesu a rutileng barutwa ba gagwe gore ba kope mo go Rara yo o mo legodimong gore ba se ka ba gogelwa mo thaelong, mme le fa ba ka raelwa ke tsa nama, le tsa lefatshe, le ke Satane ka esi, ba fenye dithaelo tseo, ba nnele ruri mo phenyong go ya bokhutlong, ba itshoke mo tumelong. Jesu o tshwaya ka setshwantsho sa mojawadi gore go dirafala ka mefutafuta gore peo ya tumelo e tloswa, e ise e mele sentle, gongwe tumelo e tingwe, maungo a tumelo, a

tshabologo, a lorato, a tsholofelo a ise a bonale, a ise a butswa. Ga tse di mo mmung o o majwe ke ba e a reng ba utlwile, ba tshole Lefoko ka boitumelo; mme ga ba na modi. Ke ba ba dumelang ka sebakanyana fela, mme mo motlheng wa thaelo ba tenege. Tse di wetseng mo ditlhatshaneng tse di mitlwa ke bone ba ba utlwileng, mme ba tsamaya ba imelwa ke matshwenyego le mahumo le menate ya lefatshe, ba hupediwa, mme go se ke go butswa leungo lepe mo go bona." Ke ka ntlha ya moo, fa re kaelwa, le go tsoselediwa ka metlha gore re itshoke, re nnele ruri mo tumelong ka boitshoko jo bogolo.

Boitshoko joo bo akareditse le tirafatso ya go dirafatsa thato ya Modimo gore tumelo ya rona e se nne ya molomo fela, mme e nne e e ungwang maungo a mantle ka fa thatong ya Modimo, e se nne tumelo e e utlwang, e e reetsang fela ka ditsebe, mme e nne tumelo e e tsenang le mo dinaong tsa modumedi gore a tsamaye mo ditseleng tsa Morena, e nne tumelo e e tsenang le mo matlhong a modumedi gore a itumelele tsa Morena fela, e nne tumelo e e tsenang mo lolemeng lwa modumedi gore a bue fela mafoko a a kgatlang Modimo, tumelo e nne e e tsenang le mo diatleng tsa modumedi gore a nne a dire fela tse di tsamaelanang le thato ya Modimo e re e senoletsweng mo molaong wa ona, le mo Efangeleng ya ga Jesu Keresete. Ke se segolo gore motho a gopole gore ga go lekane go dira tsona fela tse di dirafatsang thato ya Modimo e re e senoletsweng mo molaong wa ona. Ka sekao: Go a batlega gore yo o tlotlang rraagwe le mmaagwe ka fa taolong ya bone a se ka a khutla foo, a se gopole gore ka go ba tlotla o tla bona botshelo jo bo sa khutleng.

Motho yo o dirafatsang thato ya Modimo e re e senoletsweng mo molaong wa ona, o tshwanetse go dirafatsa le thato ya Modimo e re e senoletsweng mo Efangeleng ya ga Jesu Keresete, a itse, a gopole gore ga a na go bona botshelo jo bo sa khutleng ka go dira tse di molemo fela ka fa molaong wa Modimo, mme go batlega gore a dumele mo go Keresete, a mo ikanye, a solofele gore ka go dumela mo go ene o tla amogela tse re di solofeditsweng ke Modimo.

Lefoko la thero ya kajeno le re: "E tle e re lo sena go dirafatsa thato ya Modimo, lo amogele se se solofeditsweng," e bong boitshwarelo jwa dibe ka ntlha ya ga Jesu Keresete, le tsogo ya nama ka ntlha ya ga Jesu Keresete, le phologo ya botshelo jo bo sa khutleng ka ntlha ya ga Jesu Keresete. Ga go ope yo o di amogelang, fa e se ka go dumela mo go Jesu Keresete. Mo tumelong eo go batlega boitshoko jo bogolo gore re se latlhe tsholofelo eo, re nne re lete, re letele go bowa ga Morena. Fano re solofeditse gore ke sebakanyana fela, ga tse: "Go sa ntse go le sebakanyana se sekhutshwanyane, mme yo o tshwanetseng go tla, o tla tla, a sa

diege." Re a tiisa, re re: Jesu Keresete o tla tla, a tle go athola batshedi le baswi ka letsatsi la bofelo.

Fa a tla tla, o rata go re fitlhela gore re nne mo tumelong, le mo boikanyong, le mo boitshokong, re ntse re dirafatsa thato ya gagwe. Ke sona se re se bolelelwang ka bokhutshwane ka Lefoko la thero ya kajeno. Amen.

**9. Thapelo:** Morena, re a go leboga, ka o re senoletse thato ya gago mo molaong le mo Efangeleng. O re thuse ka Mowa o o Boitshepo wa gago gore re e dirafatse, re tle re amogele se re se solofeditsweng ke wena ka ene Jesu Keresete, Morena le Mopholosi wa rona. Amen. Thapelo ya Morena: Rara wa rona ...

10. Sefela sa 185 - 171/178

A kagiso ya Modimo e e fetang thaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber ka ngwaga wa 1996/2002/2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.